

Dimanche 18 novembre 2012

[Leta ya Kagame ikomeje guhiga urubyiruko irushinja ngo kuba ruri mu migambi yo kuyihirika !](#)



Noneho Leta ya Kagame irahigisha uruhindu urubyiruko irushinja ngo kuba ruri mu migambi yo kuyihirika. Uretse abafunzwe kubera ko ngo banenga leta ubu mu midugudu ya Kangondo ya I, Cyibiraro ya I na Cyibiraro ya II ho mu kagali ka Nyarutarama umurenge wa Remera akarere ka Gasabo mu mujyi wa Kigali haravugwa inama z'umuyobozi w'akagali na njyanama y'umurenge ndetse ngo na komite y'umutekano w'akagali, iyo nama ngo ikaba yarabaye kuwa gatatu taliki 14 Ugushyingo 2012 ikaba ngo yari igamije kwihanangiriza abanenga FPR, gukora urutonde rw'abayinenga n'abatumva ubutegetsu bwayo bagaterwa ubwoba bababwira ko ngo bari muri FDLR nyamara bo ngo bavuga ko bari mu ishyamba rya FDU rya Ingabire.

Nyuma y'uko iyo nama ibaye hatumijwe bamwe mu rubyiruko rutuye muri utwo tugali uko ari dutatu ngo bajye kwisobanura ngo ku byerekeranye n'uko bahungabanya umutekano w'igihugu. Ni taliki 15 Ugushyingo 2012 aho bahamagajwe ku kagali ka Nyarutarama maze bahatwa ibibazo ndetse ngo baranihanangirizwa bikomeye.

Urubuga Rwanda in Liberation Process rwamenye ayo makuru maze rugerageza gushakisha ibyavugiye muri iryo bazwa maze rusanga amakuru ateye atya:

Ibazwa ryatangiyeye saa kumi na mirongo ine n'itanu za nimugoroba, ribera ku biro by'akagali ka Nyarutarama. Hari hoherejwe umupolisi utaramenywe amazina kugirango atere ubwoba abarwanashyaka ba FDU. Emmanuel Gasana akaba yakuwe mu gisirikari agahabwa kuyobora igipolisi mu rwego rwo kugirango azahangane na Ingabire

n'abazagerageza kwinjira mu ishyamba rye bose. Uwo mugambi yawushyize mu bikorwa uko ashoboye n'ubwo abanyarwanda bamaze kurwara ikirungurira kubera akarengane gaturuka ku butegetsi bwa Kagame cyane cyane igipolisi.



**Emmanuel Gasana yakuwe mu gisirikari
ajyanwa kuyobora polisi kugirango
asahangane na FDU na Ingabire**

Uwamenya amazina y'uwo mupolisi woherejwe gutera ubwoba bariya barwanashyamba yayatangaza kugirango hamenyekane abari mu migambi yo gutoteza abanyarwanda kuko wenda hari igihe kizagera bakabiryoza kuko ntagahora gahanze.

Dore ikipe y'ababazaga :

1. Umunyamabanga nshingwabikorwa w'akagali ka Nyarutarama
2. Umupolisi ufite ipeti rya Sous Lieutenant
3. Ushinzwe umutekano mu murenge wa Remera
4. Ushinzwe imibereho myiza y'abaturage mu kagali
5. Njyanama y'akagali ka Nyarutarama (abantu batanu)
6. Abayobozi b'imidugudu itatu (batatu)
7. Abashinzwe umutekano mu midugudu itatu (batatu)

Ababajijwe bose hamwe bari icyenda batuye mu midugudu itatu twavuze haruguru. Dore uko ibazwa ryagenze muri rusange : Ibazwa ryabaye taliki 15 Ugushyamba 2012 kuva saa kumi n'igice za nimugoroba ribera ku biro by'akagali ka Nyarutarama aho Umunyamabanga nshingwabikorwa w'akagali yatangiye ashimira abo mu nzego za leta baje gukurikirana iryo bazwa we yise inama hanyuma avuga ko abitabiriye ibyo bikorwa bose badashinzwe umutekano aranaberekana. Nyuma yakomeje agira ati **aba mureba dufite amakuru ko hari ibikorwa bihungabanya umutekano barimo.**

Polisi : Ni nde ubahagarariye ?

Théophile : Twatumwiwe twese ntawe uhagarariye undi

Umurenge : Mwatumiwe na nde ?

Théophile : N'umuyobozi w'umudugudu

Polisi : Duhe amakuru kuri aba bantu

Umudugudu : Nabatumwe n’umuyobozi w’akagali

Executif : Aba bantu ngo barashaka gukora igisirikali cy’ishyamba ngo bakunde bakureho ubutegetsu

Polisi : Nibagende. Uri umusirikari ? Uzi urugamba ?

Théophile : Ndi umusivile ntarwo nzi nta n’urwo nifuza

Umurenge: Nonese ni ubwa mbere mubonanye?

Umwe muri njyanama (Habyara): Kandi dufite amakuru ko bashaka kujya muri FDLR kandi bakorana amanama buri muni

Polisi: Eh! Ni byo?

Théophile: Ntabwo ari byo ariko

Polisi: Ariko iki?

Théophile: Nimundeke mbasobanurire

Imibereho myiza: Vuga

Théophile: Twe dufite ikindi duhuriyeho kitari FDLR

Uwo muri njyanama: Igiki?

Théophile: Twe turi abanyamuryango ba FDU

Ushinzwe amakuru (Sam): FDU?

Théophile: Yego

Local defense: FDU ni iki?

Ubazwa (Domonique): Ni umutwe wa politiki usaba gukorera mu Rwanda

Polisi : Ubisaba nde ?

Théophile: ubisaba leta y’u Rwanda

Exécutif : Ariko wowe uri umuvugizi w’uwo mutwe ?

Théophile : Oya ndi umurwanashyaka nk’abandi

Njyanama : Abandi ni ba nde ?

Théophile : Urugero aba turi kumwe n’abo mutabona kuko FDU ntabwo yavukiye i Nyarutarama

Polisi : Yavukiye he ?

Ubazwa (Michel) : Ndumva ibyo atari twe wabibaza tuzi ko ubizi

Umurenge : Twaje guterana amagambo namwe ?

Polisi: Vayo hano (Théophile). Muzi aho u Rwanda rwavuye?

Théophile: Oya navutse ndusanga

Executive: Arakubaza amateka mabi rwavuyemo

Théophile: Ndayazi kandi nta n’uwifuza kuyasubiramo

Polisi: Nonese iyi mitwe mufonda ni iy’iki?

Théophile : Ntabwo ari imitwe ni ishyamba rya politiki kandi ni iby’agaciro kuriyamo

Polisi : Akahe gaciro ubiha ?

Théophile : Iyo mutibumbira muri FPR mwari gutabara u Rwanda ?

Polisi : Ko tubona mwe mubumba ngo murutabe ?

Executif: Uyu ni we nakubwiraga

Polisi: Wize amashuri angahe?

Théophile Ntabwo nigeze niga uretse primaire

Executive: Nonese ubwo ntiwize?

Polisi: Ushobora gukurikiza inama nkugira?

Théophile : Mbwira numve ariko sinkubwiye ko mbikurikiza ntarabyumva

Polisi : Ariko ko ufite umutwe ukomeye ?

Théophile : Ntabwo ari umutwe ukomeye. Nonese ungiriye inama yo kwica umuntu namwica?

Polisi: Nyumva. Uri umwana muto urashaka ejo hazaza, reka kwishora mu ngorane ngo unajijishe bagenzi bawe

Théophile: Ntabwo ari jye ubajijisha buri wese azi ibyo akora

Polisi: Ngwino hano (Theophile). Kuki ari wowe mpamagaye?

Théophile: Impamvu sinyizi

Polisi: Ntuyizi nyine nje ndayizi. Wumvise ibyo nakubwiye?

Executive: Ntumuzi mumbaze turahorana

Théophile: Unzi ho iki? Ndiba?

Executif: Oya. Afande, nonese turarara aha?

Polisi: Mbese igihe nagushaka nakubona?

Théophile: Wanteguje wambona

Polisi: Mpa numero yawe (arayimuha)

Local defense ahamagara Mariam

Polisi: Nkawe uwakubwira ngo usimbuke metero imwe ntiwabishobora ariko dore ibintu wishoyemo

Mariam: Ibiki se?

Imibereho myiza: Nawe ntubizi?

Mariam: Kandi muvuga ko nabyishoyemo. Nabyishoramo ntabizi?

Polisi: Eeeee! Urabizi?

Mariam: Yego

Polisi: Mukorera he inama? Muzikoreshwa na nde? Hehe?

Mariam: N'ubu turi mu nama

Executif: Bamaze kwandura bose

Théophile: Ariko kuki wanga umuntu usubiza?

Umurenge: Ni nde wowe ukubajije?

Executif: Ndamumenyereye twirirwa duterana amagambo wagirango ni we wampaye akazi

Polisi: Jya kwicara

Umurenge: Nimureke afande afate umwanzuro dutahe (bajya mu mwiherero iminota igera kuri 30).

Bagarutse

Polisi: Muri rusange nyiramatwi yumva yumvise. Uwumva ko ibyo akora abaze umutwe we yibaze ati nyoborwa na nde? Ari he? Amerewe ate?

Umurenge: Ubundi muyoborwa na nde?

Ubazwa (Vincent): Na Madame Ingabire Victoire

Executif: Nonese ari he?

Mariam: Arafunze

Polisi: Namwe nibyo mushaka?

Ubazwa (Mugabo): Bibaye ngombwa. Ko uburenganzira ari ubwanyu. N'ubu turafunze.

Polisi: Mwafunzwe na nde?

Théophile : Ubuse ko nari mfite umushyitsi nabashije kumwakira ?

Polisi : Ngaho nimutahe umwakire ariko nejejwe no kubona icyo cyubahiro umwamikazi wanyu yabonye akomeze. Sawa nimutahe.

Aba bose uko ari icyenda babazwaga baratashye banyura kwa mugenzi wabo Theophile Ntirutwa. Mu gihe bari bicaye baganira umunyamabanga nshingwabikorwa w'akagali ka Nyarutarama aba abagezeho atangira kubacyurira no kubaningura ababaza ngo muratashye muriyakira kuko mwatsinze ? Baramusubiza bati twatsinze se hari urubanza twarimo ? Nibutse kandi ko Ari uriya Theophile ari na Michel bafunzwe taliki 17 Ukwakira 2012 nabwo bazizwa ko bari muri FDU. Umwe akaba yarafungirwa kuri polisi ya Remera undi agafungirwa kwa Kabuga i Gikondo ndetse uwafungirwa kuri polisi yaje kongera arafungwa bitewe n'umusirikari wari wamushimutiye ibintu naho undi wafungirwa kwa Kabuga yafunguwe nyuma y'iminsi icumi nabwo asabwe kuva muri FDU bo bamubwiraga ko ari imitwe y'abagizi ba nabi igamije guhungabanya umutekano.

Mbese Leta ya FPR yakweruye ikarega FDU ko ari ishyaka rigamije guhungabanya umutekano bityo abanyarwanda bakareka kuriyamo aho guhora ihiga abantu bifuzwa kujya mu ishyaka bishakiye ?

Ngibyo rero ibyo aba basore n'inkumi bakorewe n'intore za FPR taliki 15 Ugushyamba 2012 aho bacunagujwe kakahava. Twibuke ko hari bagenzi babo nabo bakabakaba uriya mubare bafungirwa muri **gereza ya Gitarama** bakomoka mu karere ka **Rutsiro** mu ntara y' **Uburengerazuba** nabo baregwa kuba mu ishyaka FDU rya Ingabire. Mbese FPR izafunga abanyarwanda bese ibarangize ? Ikizwi ni uko ubutegetsi bwa Kagame buri mu minsi yabwo ya nyuma none bwatangiye guhiga ibyitso bubifunga. Amateka ntatinda kwisubiramo kuko ibi byarabaye muri za 90-94 aho abantu bafungwaga abandi batotezwa abandi bazimizwa bazizwa ko ngo bari ibyitso by'inkotanyi none dore na FPR ibonye isumbirijwe itangira guhiga aba FDU ibeshya ko bari muri FDLR. Tubitege amaso ariko ibya FPR ubanza byaba bigeze ku iherezho.

Umukunzi wa RLP Kalimunda J.
Nyarutarama/Gasabo